

Na osnovu člana 2.9 stav (1) tačka 2, a u vezi člana 20.16d stav (1) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24) i člana 18. Poslovnika Centralne izborne komisije Bosne i Hercegovine ("Službeni glasnik BiH", broj 29/18, 25/20 i 32/23), Centralna izborna komisija Bosne i Hercegovine je na 13. sjednici, održanoj 03.04.2024. godine, donijela

ODLUKU
o djelokrugu primjene pilot projekata Centralne izborne komisije BiH za Lokalne izbore 2024. godine

Član 1.
(Predmet)

Odlukom o djelokrugu primjene pilot projekata za uvođenje specifičnih izbornih tehnologija Centralne izborne komisije BiH za Lokalne izbore 2024. godini (u daljnjem tekstu: Odluka) definiše se djelokrug primjene pilot projekata Centralne izborne komisije BiH za Lokalne izbore 2024. godine sa ciljem testiranja izbornih tehnologija i simulacija njihove primjene na biračkim mjestima u Bosni i Hercegovini, radi provjere tehničkih mogućnosti provedbe određenih procedura sa ciljem jačanja ukupnog integriteta u izbornom procesu i dobijanja relevantnih pokazatelja potrebnih za buduću primjenu i evaluaciju ovih tehnologija na biračkim mjestima.

Član 2.
(Djelokrug primjene Pilot projekata)

Djelokrug primjene pilot projekata uključuje vrste i cilj pilot projekata, donatore uz čiju podršku se realizuju pilot projekti, osnovne izborne jedinice i broj biračkih mjesta na kojima se provode pilot projekti i kriterije za određivanje biračkih mjesta.

Član 3.
(Vrste pilot projekata)

Na dan održavanja Lokalnih izbora 2024. godine Centralna izborna komisija BiH provest će sljedeće pilot projekte:

1. Pilot projekat 1 - Autentifikacija birača i transmisija rezultata
2. Pilot projekat 2 - Optički skeneri i automatsko prebrojavanje glasačkih listića
3. Pilot projekat 3 - Biometrijska identifikacija i autentifikacija birača

Član 4.
(Pilot projekat 1 -Autentifikacija birača i transmisija rezultata)

(1) Autentifikacija birača, u smislu ove Odluke, je postupak potvrđivanja identiteta birača na biračkom mjestu, koji se vrši nakon izvršene identifikacije putem ličnog dokumenta iz člana 5.12 stav (4) Izbornog zakona BiH, i podrazumjeva proceduru usporedbe biometrijskih podataka otiska prsta birača u evidencijama Agencije za identifikacijske dokumente, evidenciju i razmjenu podataka.

(2) Transmisija rezultata, u smislu ove Odluke, je postupak dostave rezultata izbora sa biračkog mjesta Centralnoj izbornoj komisiji BiH putem on-line aplikacije i vrši se nakon ručnog prebrojavanja rezultata glasanja.

Član 5.

(Podrška za realizaciju Pilot projekta - 1)

Pilot projekat – 1 realizira se uz podršku Delegacije Europske unije koja je za potrebe provedbe pilot projekta osigurala potrebnu hardversku opremu i izradu odgovarajućih softvera.

Član 6.

(Lokacije za provedbu Pilot projekta - 1)

(1) Pilot projekat - 1 provodi se na 165 biračkih mjesta u 10 osnovnih izbornih jedinica, i to:

- a) Stari Grad Sarajevo
- b) Tešanj
- c) Doboj
- d) Bijeljina
- e) Trebinje
- f) Gradiška
- g) Goražde
- h) Ljubuški
- i) Sanski Most
- j) Zvornik

(2) Centralna izborna komisija BiH posebnim aktom određuje biračka mjesta iz stava (1) ovog člana po sticanju uvjeta za određivanje biračkih mjesta od strane izborne komisije osnovne izborne jedinice iz člana 5.1 stav (2) Izbornog zakona BiH.

Član 7.

(Pilot projekat 2 -Optički skeneri i automatsko prebrojavanje rezultata glasanja)

Upotreba optičkih skenera, u smislu ove Odluke, na biračkim mjestima je procedura ubacivanja glasačkih listića u glasačku kutiju kroz optički skener koji automatski prebrojava rezultate glasanja, te omogućava direktnu transmisiju rezultata. Automatski prebrojani rezultati glasanja se nakon zatvaranja biračkih mjesta elektronski dostavljaju Centralnoj izbornoj komisiji BiH.

Član 8.

(Podrška za realizaciju Pilot projekta - 2)

Pilot projekat – 2 bit će realiziran uz podršku USAID-a koji će za potrebe ovoga projekta izvršiti nabavku optičkih skenera i pratećih aplikativnih rješenja, te podržati Centralnu izbornu komisiju BiH u provedbi obuke korisnika uređaja, kao i provedbi edukacijske kampanje.

Član 9.
(Lokacije Pilot projekta - 2)

(1) Pilot projekat - 2 provodi se na statistički i demografski relevantnom uzorku od 145 biračkih mjesta u 6 osnovnih izbornih jedinica i to:

- a) Vogošća
- b) Tuzla
- c) Visoko
- d) Stolac
- e) Novi Grad
- f) Prijedor

(2) Centralna izborna komisija BiH posebnim aktom određuje biračka mjesta iz stava (1) ovog člana po sticanju uvjeta za određivanje biračkih mjesta od strane izborne komisije osnovne izborne jedinice iz člana 5.1 stav (2) Izbornog zakona BiH.

Član 10.
(Pilot projekat 3 – biometrijska identifikacija i autentifikacija birača)

Biometrijska identifikacija i autentifikacija, u smislu ove Odluke, birača je postupak potvrđivanja identiteta birača na biračkom mjestu, koji se vrši nakon izvršene identifikacije putem ličnog dokumenta iz člana 5.12 stav (4) Izbornog zakona BiH, i podrazumjeva proceduru usporedbe biometrijskih podataka otiska prsta birača putem uređaja za identifikaciju u koji su integrirani biometrijski podaci ili koji se u realnom vremenu provjeravaju u evidencijama Agencije za identifikacijske dokumente, evidenciju i razmjenu podataka.

Član 11.
(Podrška za realizaciju Pilot projekta - 3)

Pilot projekat – 3 će biti realiziran uz podršku OSCE Misije u Bosni i Hercegovini koji će za potrebe ovoga projekta isporučiti uređaje za identifikaciju, osigurati potrebna aplikativna rješenja, izvršiti obuke korisnika uređaja i provesti edukacijsku kampanju.

Član 12.
(Lokacije Pilot projekta - 3)

(1) Pilot projekat – 3 će biti organiziran na biračkim mjestima u osnovnoj izornoj jedinici Brčko distrikt BiH.

(2) Centralna izborna komisija BiH posebnim aktom određuje biračka mjesta iz stava (1) ovog člana po sticanju uvjeta za određivanje biračkih mjesta od strane izborne komisije osnovne izborne jedinice iz člana 5.1 stav (2) Izbornog zakona BiH.

Član 13.
(Kriteriji za određivanje biračkih mjesta)

Biračka mjesta na kojim će biti organizirani pilot projekti Centralne izborne komisije BiH za Lokalne izbore 2024. godine određuju se uzimajući u obzir:

- a) zastupljenost biračkih mjesta iz Federacije BiH, Republike Srpske i Brčko distrikta BiH,
- b) broj birača,

- c) lokacija biračkog mjesta u osnovnoj izbornoj jedinici (kako bi se obuhvatila biračka mjesta koja se nalaze u gradskoj, međugradskoj i ruralnoj zoni) i
- d) da biračka mjesta ispunjavaju materijalno-tehničke uvjete posebno uključujući pokrivenost internet signalom.

Član 14.
(Poseban propis)

Centralna izborna komisija BiH će, u roku od 30 dana od dana stupanja na snagu ove Odluke, posebnim propisom regulirati distribuciju, instalaciju, sigurnost i korištenje specifičnih izbornih tehnologija i druge odgovarajuće opreme potrebne za realizaciju pilot projekata, kao i za sve druge dodatne aktivnosti u cilju osiguranja sigurnosti, integriteta i funkcionalnosti odabranih izbornih tehnologija u provedbi pilot projekata, uključujući i utvrđivanje odgovornosti nadležnih organa zaduženih za provedbu izbora i drugih nadležnih organa u Bosni i Hercegovini.

Član 15.
(Izmjena Odluke o djelokrugu primjene pilot projekata Centralne izborne komisije BiH za Lokalne izbore 2024. godine)

Centralna izborna komisija BiH može u saradnji i konsultacijama sa donatorima vršiti izmjene ove Odluke.

Član 16.
(Provedba odluke)

Ovu Odluku Centralna izborna komisija BiH će provoditi u saradnji sa Agencijom za identifikacione dokumente, evidenciju i razmjenu podataka Bosne i Hercegovine (IDDEEA) i Agencijom za zaštitu ličnih podataka u Bosni i Hercegovini.

Član 17.
(Stupanje na snagu i objava u službenim glasilima)

Ova Odluka stupa na snagu danom donošenja a objavit će se u „Službenom glasniku BiH“, „Službenim novinama F BiH“, „Službenom glasniku RS, u „Službenom glasniku Brčko distrikta BiH“ i na internet-stranici Centralne izborne komisije BiH www.izbori.ba.

Broj: 05-1-02-2-419-1/24
Sarajevo, 03.04.2024. godine

Predsjednica
Dr. Džena Hadžić

